



# Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail: tiryimiyim@gmail.com

TAPAK 8

Yangia anidakangma :

f Tir Yimiyim

tiryimiyim@aolima

tir yimiyim

TAPAK 10



### Taliban ya kasa civilian dang lir: PM Imran Khan



### Tokyo Olympics: Satish Kumar quarter-final-i iogo

VOL. XVIII NO. 286 (ADOK 286) DIMAPUR

ROGONÜ (FRIDAY)

CHITENI (JULY) 30, 2021

₹ 5.00

## Sivasagar district nung Nagaland den arrtsülen aonung curfew benok

**Guwahati/Chiteni/July 29 (Agencies):** Additional District Magistrate (ADM), Sivasagar, Assam ajanga Nagaland den arrtsüa aliba Sivasagar district, Assam tsütsü kilometer 5 tsüingta July 1, 2021 nü nungi tenzüka anogo 60 atema aonung 6:00 ako nungi anepdang 6:00 ako tashi curfew alitsü, ta metetdaksü. ADM, Sivasagar ajanga sangdong ka nung ashiba agi, Assam-Nagaland arrtsü anasa

Sivasagar district nung kota masüba timtem majurutsü mechi aonung curfew ya benok. Curfew aliba mapang nisung kija, telok mesüra gari senzüsempogba ajanga nokdang. Ajisüaka magistrate, army/CRPF/Police nungi security personnel aser civil kettangsurtem mapa inyaksü nunglokja alirtemiba tenokdangba küboki maiter, ta sangdong ajanga ashi.

## Assam sorkari nüburtem dang Mizoram-i maotsü ajungshir

**Guwahati, Chiteni/July 29 (Agencies):** Assam sorkari July 29, 2021 nü 'travel advisory' ka sangdonga state nung aliba nüburtem dang Mizoram-i maotsü ajungshia liasü. "Tang tensa mejungi aliba ajanga Assam nung aliba nüburtem dang Mizoram-i maotsü ajungshir, kechiaser Assam nüburtem kumzüka aliba nung timtem ashitsü makok," ta Assam Home and Political department ajanga sangdong ka nung ashi.

asere kidanger state nungi nüburtem aitsü memelatsü, ta Brehostibarnü sangdonga liasü. Arrtsü alema orr Mizoram Police aser civilian temi amak, ta tai tonglokja aliba lendong nung police trok aser civilian ka tepseta ano nisung 50 yirur anogo ishika lir longkak aitsü ya ayongzüker. Parnoki ashiba agi, Guwahati tezülen Jorabat tesem nung mokdangtsü aser Mizoram nungi chiyongtsü abenba gari kata ajanga modaktsütsü. Bir Lachit Sena züngsemtemi Brehostibarnü Guwahati nung Mizoram House jakdang longkak aita iba ki shibangtsü takhangba agüja liasü. "Mizoram nungi nisung shinga Assam-i arutsü memelatsüla. Kasa mapang state sorkar dang Mizoram nung aliba Assam nübur nem tanükba agütsütsü ajungshir, aser nüngdakra parnok meyipa anir arung," ta Bir Lachit Sena züngsemi ashi.

Kasa sangdong nungsa Assam nung tang Mizoram nung alir dang kumdanga alitsü ajungshia liasü. "Mapa dak sendakba nung Mizoram nung aliba Assam nüburtem dang kanga kumdanga alitsü ajungshir," ta ashi. **MIZORAMANEMA RONGSENKETZÜNG MOKDANGTSÜAKHANGER** Guwahati, Chiteni/July 29 (Agencies): Assam nung amenoka aliba lokti tentet, Bir Lachit Sena, ajanga Honibarnü nungi tenzüka Mizoram anema mapang telatet makai rongsenketzüng mokdangtsü,

Hombarnü iba azüdokshi atalokba sülen Cachar aser anasa aliba district tem nunga lokti tentet balalai iba ama rongsenketzüng tenokdangba benoka lir.

## NEIPF online senden ka menogo

**Dimapur, Chiteni/July 29 (TYO):** Dholai nung Mizoram aser Assam arrtsü nung mangatetep adoka Assam police trok tashi taküm samaba ken o sensaksemtsü atema North East Indigenous Peoples Forum (NEIPF) online senden ka menogo. NEIPF ya teloktep lokti ka lir aser Northeast kübok state tenet prongla nung telen kaka lir. NEIPF-i, arrtsü nung mangatetep adoka nisung taküm samaba osang angazüka kanga aoksaba aser mang ayimba lemsatepba den Assam aser Mizoram Chief Minister dang arrtsü nung yimjung bener arutsü atema jenjang tapet agitsü mepeshia metetdaksüo. NEIPF-isa, mangatetep adoker aliba tesemtem nung benoka aliba inyakyim dak alia minyaksü atema state sorkartem tsüingda tenangzüketpba yanglur lir, ajisüaka mapangshia iba tangatetep ya sentoka toktsür aser iba ajanga item tesemtem

nung aliba nüburtem takoksa jenti ajurur, ta ashi. North East nung aliba state tem tsüingda arrtsü dak sendakba nung mangatetep ya mapang talangka nungi adoka arudar aser mapang shia mangatetep adoker. Ken o mebenetba ajanga arrtsü nung item tesemtem nung alirtemi timtem tekangshi aika ajangshir aser nisung taküm dena lalur. NEIPF-i, nüburtem ajak dang süngjemshitsü aser ken o tem ajak sensaksem ajanga bentettsü mepeshia metetdaksüo. State arrtsü aser talisa mangatetep adoker aliba tesemtem timbaka ozüing alema arua aliba bendangertemi atsünger lir, aser iba ajanga Northeast nung aliba lisopurtem lendongbang nung toktsür. NEIPF-i, arrtsü nung aliba lisopurtem densema iba ken o dak sendaka aliba kija aser lokti tentettem dang longjemer nokdaksü aser yimjung nung alitsü atema inyakteptsü mepeshia metetdaksüo.

## Tesayurtem mozü agitsü atema SOP yanglushitsü tuyu

**Kohima, Chiteni/July 29 (TYO):** Kaket-rejutem tanaben melapokdang tesayur aser tesayur masüba staff tem ajunga COVID-19 mozü agitsü atema July 19 nü totuyuba agüja aliba tera melenshitsü atema Gauhati High Court, Kohima Bench ajanga Nagaland sorkar nem totuyuba agitsü. July 26 nungi college aser technical institution tem tanaben lapoktsü aser Classes 11 aser 12 tem August 2, 2021 nungi lapoktsü atema July 19, 2021 nü Nagaland Home Department-i Principal

Secretary ajanga Standard Operating Procedures (SOPs) temeja ka agüja, COVID-19 nungi kumzüka alitsü asoshi mera ka ama attendance shilem 50 dang mela liasü. Chief Secretary indang totuyuba nungsa tesayur aser non-teaching staff ajunga COVID-19 mozü dose anaprong agitsü mesüra dose mezüingbuba agir anogo 15 bo junger alitsüla, ta shia liasü. Ajisüaka Bodhbarnü suo moto PIL ka benoka iba totuyuba ya yanglushitsüla, aser mozü

maginertem anogo 15 shia COVID-19 tendangtsüla, ta benoka liasü. GHC Kohima Bench nung obendanger Justice Songkhupchung Serto aser Justice S. Hukato Swu nati Bodhbarnü iba ken o nung obendanger agütsüba mapang, nisung shinga mozü agiba ya 'compulsory' masütsüla, ta ashi. Anungji Court ajanga Principal Secretary Home dang SOPs ana indang paragraph ya yanglushia school aser college nung tesayur aser non-teaching staff nem danga lenmang agütsütsüla, ta ashi.

## COVID-19 Nagaland: Nisung 67 dak putet; 113 taneptsü nguogo

**Kohima, Chiteni/July 29 (TYO):** Brehostibarnü Nagaland nung nisung 67 dak tashidak potetba sülen ajak senteper tashidak menar 27,653 jungogo aser kasa mapang nung nisung 25,000 tema taneptsü nguogo. "Tanü tashidak poteter nisung 67 ya Dimapur nungi 25, Kohima 14, Mokochung 10, Phek & Tuensang 5, Mon 4, Wokha 3 aser Longleng nungi 1 lir," ta Integrated Disease Surveillance Project atema State Nodal Officer, Dr Nyanthung Kikon-i ashi. Paisa, "tashidak menar alir nisung nisung 133 taneptsü nguogo. Taneptsü angurtem rongnung Kohima nungi 38 Mokochung 30, Dimapur 23, Longleng 17 aser Tuensang nungi 5 densema lir aser parnok densema taneptsü angur ajak senteper nisung 25,023 jungogo," ta ashi. Bodhbarnü recovery rate 90.29

percent aliba tanübo 90.48 percent jungogo. Tang nisung 1,299 tashidak agi tonger temang anepaludar aser item rongnung nisung 176 dak tashidak keta aliba teamitsü terara sayudar, nisung 37 oxygen agidar, nisung 21 tashidak agi kanga mejungi kongshir oxygen agidar, nisung 7 ICU nung ventilator magi-i lir aser nisung 5 ventilator agidar. Kasa mapang nung tashidak mena alir 1,053 dak tashidak keta aliba temaitsü kecha mesayur, ta pai ashi. Brehostibarnü tashidak agi shiranga alir pezü asüba sülen state nung asür 556 jungogo. Tanü asürtem ya Mokochung nungi 3 aser Dimapur nungi 1 liasü. Ajak senteper COVID-19 agi shiranger 775 tanga state-i anirogo, ta pai ashi. "Tang tashi nung Nagaland nung COVID-19 sample 260,759 tendangogo. Sample tem ya RT-PCR

nung 102,338, TrueNat ajanga 67,524 aser Rapid Antigen Test ajanga 90,897 tendangogo," ta Dr Kikon-i ashi. Bodhbarnü tashi nung Nagaland nung COVID-19 vaccines dose 758,089 nisung 611,205 nem agütsüo, ta State Immunization Officer Dr Ritu Thurr-i ashi. State nung vaccine agir alirtem rongnung yakbang nung inyakertem 60,759, healthcare professionals 15,961, arishi küm 45 tempur 183,968 aser arishi küm 18 aser 44 tsüingda alir 350,517 densema lir. Beneficiaries ajak senteper nisung 146,884 nem vaccine dose anaprongla agütsüo. Item rongnung yakbang nung inyaker 39,033, healthcare workers 12,363, arishi küm 45 tempur 95,187 aser arishi küm 18 aser 44 tsüingda alir 301 densema lir, ta Dr Thurr-isa metetdaksü.

## All-India medical admission atema sorkari quota sangdong

**New Delhi, Chiteni/July 29 (Agencies):** Brehostibarnü central sorkari tang academic year, 2021-22 nungi tenzüka undergraduate aser postgraduate medical aser dental courses asoshi All-India Quota (AIQ) scheme atema OBSs pur atema quota shilem 27 aser Economically Weaker Section (EWS) category pur atema shilem 10 sangdongogo. "Iba telemtetba ya ajanga küm shia MBBS nung OBC kaketshir 1500 jungnua aser postgraduation nung OBC kaketshir 2500 ajangzüksü aser EWS kaketshir MBBS nung 550 shi aser postgraduation nung 1000 shi ajangzüksü," ta health ministry ajanga sangdong ka nung ashi. Iba telemtetba ya alizüing ka lir aser iba ya ajanga küm shia lanur meyrirjang aika ajangzüksü, ta Ato Kilonser Narendra Modi-i ashi. "Asen sorkari telemtetba tajung

ka agia All India Quota Scheme nung undergraduate aser postgraduate medical/dental courses tem asoshi tang academic year nungi tenzüka OBCs nem reservation shilem 27 aser Economically Weaker Section atema shilem 10 agütsür. Iba yagi küm shia lanur meyrirjang aika nem maongka tajungba agütsütsü aser asen linük nung social justice tsütsü tatishitsü tasen ka yanglutsü," ta pai tweet ka nung ashi. "Ato Kilonser Narendra Modi-i July 26, 2021 nü senden ka nung Union Ministry tem dang mapang talangka nungi meinyaki bendena aruba ya tajungtuba nung bentet-ratetsü totuyuba agütsü," ta sangdong ajanga ashi. Iba mera ya agiba sülen linük nung aliba OBC kaketshirtemi tangbo state mashi ka nung azüingtsü atema AIQ scheme nung aliba reservation teyari ya agitettsü.

AIQ scheme ya 1986 küm Supreme Court indang totuyuba kübok state mashi nungi danga state nung medical college tajung nung azüingtsü jangraba kaketshir nem 'domicile-free merit' nung ajemdaker maongka agütsütsü benoka liasü. UG menden aliba ajunga nungi shilem 15 aser government medical college nung PG menden aliba nungi shilem 50 iba all-India quota nungya lir. Union Health Minister Mansukh Mandaviya-ia iba mera agiba ya tenüingsang agüja liasü. "Linük nung medical education tsütsü sorkari otsüsü telemtetba ka agiogo. All India Quota kübok undergraduate/postgraduate, medical aser dental education nung shilem 27 reservation ya OBC kaketshir nem agütsütsü aser shilem 10 ya EWS kaketshir nem agütsütsü," ta pai tweet ka nung ashi.

## Arrtsü atema temolung tali agütsüdaktsüner: DDCF

**Dimapur, Chiteni/July 29 (TYO):** Dimapur District Citizen's Forum (DDCF) ajanga Chief Secretary, Nagaland dangi temepishiba shidi ka zülua liasü. Parnoki züluba shidi nung, Dimapur ya Nagaland nung district 8 buba ama 1997 küm December ita tentetba mapang nungi tanü tashi arrtsü tejanga ka asazüka mali, ta ashi.

Iba yongji Peren aser Dimapur ama kidanger district nung aliba yimtsüingtem tsüingta mapang shia mangatetep adoker. Nüburtem libaliru aser yimjung anema inyaksangshiba ataloka arur, aser ibaji ajanga nisung takum samar aser ki-o-jen tem raksaogo, ta DDCF ajanga ashi. Ajidang masü tesüiba mapang

Dimapur district aser Assam nung aliba district balala tsüingta arrtsü tsütsü mangatetep adoka arur, kechaser arrtsü tejanga lateta mali. Anungji iba tebilemstü atema nü tashi amshia teti yimjung alitsüsa tali meranga inyaksü teimla nung iba shidi zülur, ta DDCF tir, Yibemo Kikon aser tongti zülur Richard Haolai nati shidi nung shia liasü.





(Abelenlen noksa) Chiteni (July 29) Yangtepnu (Thursday) Holy Cross Higher Secondary School Dimapur nung taküm 2021 küm Nagaland Board of School Education ajanga agiba HSLC aser HSSLC tatitang nung takok angurtem nem konang nüksang agütsüba sentong agiba mapang takok angur kaketshirtem den tesayurtem külemi agiba noksa ka yangi angur. Item kaketshirtem rongnung Imyatetla (achijilen nungi tanabuba) lai Science subject nung mark teimtiba (subject topper) nguteta Mayangnokcha Award Trust nungi sen den konang sempet tajung ka nguogo. Iba senpet ya MAT den yaritepa Tir Yimyimi agüja arur. (Achijilen noksa) MAT züngsem Dr. Imo (abelenlen) Science subject topper Imyatetla aser Tir Yimyim yimozülur K Temjen Jamir, MAT -TY senpet aser konang agütsüba mapang agiba noksa ka yangi angur.

### India Cycles4Change tetoktepba nung Kohima top 11-i iogo

**Dimapur, Chiteni/July 29 (TYO):** India sorkari India nung Top 11 Cycling Pioneers tetushi yimti 11 nem agütsüogo. Cycles for change Challenge ya 2019 küm June 25 nü Smart Cities 100 aser India nung state yimtibatem atema tenzükjia liasü. Iba tetushi agütsüba sülen India Cycles4Change Challenge mezüngbuba season taruba stage tenzüker, kong linük kübok yimti 107 nung cycling-friendly inyakyim tem tendangtsü, angazüktsü aser cycling-friendly inyakyim balala ajungkettsü atema longjemer inyaksü aser iba ajanga India nung cycling revolution tenzüksü. Taküm küm tetenzüklen yimti 25 shim aser item rongnungi national aser international jenjang nung transport tsütsü mongintemi tendangba sülen yimti 11 shimogo aser item yimtittem nem cycling dak sendakba nung

inyakyim ajungkettsü atema sen crore kaka agütsütsü. Kohima Smart City-i sangdong ka ajanga ashiba agi, July 28 nü Secretary, Ministry of Housing and Urban Affairs (MoHUA), Durga Shanker Mishra-i, Top 11 yimtittem sangdonga liasü. Iba sentong nung Centre aser state sorkar ketdangsurtem aser India Cycles4Change Challenge nung shilem agiba yimtittem ajak nungi stakeholders tem dena liasü. Sentong nungsa Challenge report mezüngbuba saya aser yimtittem indang cycling journey Online Exhibition sentong ka agi. Ministry-isa iba tetoktepba tanabuba season August ita tenzüksü aser iba atema Smart Cities tem aser States/UTs yimtibatem aser nütsünyongsök lakh 5 dak tema aliba yimtittem jaoktsü ta metetdaksüogo. Kohima Smart City-i parnok

maparen nongita yariba atema stakeholder tem aser nübur ajak dang kanga pelaba lemsatopogo. Parnokisa, iba takok ajanga tenem nung aliba yimti tem nunga Cycle anishitetsü ta kuli agütsüba dang masü saka North East India nung yimti tilatema yimti 107 nungi Top 11-i iteter ta sayur, ta ashi. **Tetushi agizükba yimti 11 yamai alitsü:** Bengaluru, Karnataka Bhubaneswar, Odisha, Chandigarh, Punjab & Haryana Kohima, Nagaland Nagpur, Maharashtra New Town Kolkata, West Bengal Pimpri Chinchwad, Maharashtra Rajkot, Gujarat Surat, Gujarat Vadodara, Gujarat Warangal, Telangana

### Nagaland State Commission for Women-i temepeshiba ka agütsü

**Dimapur, Chiteni/July 29 (TYO):** Nagaland State Commission for Women (NSCW)-i, stakeholders ajak dang July 30 nü "World Day against Trafficking in Persons: Victims Voices Lead the Way" amungtsü atema mepshia metetdaksüogo. Commission-i ashiba agi, parnoki ozüng alema mezüngmeshia amshiba nungi jenbor aliba tetsür aser tetsür chanutem indang tajangshiba angadangba den parnok tajangshiba nungi angazüka jenjang tilaka aginer, ajita asünungdang tarutsü nung iba timtem nokdangtetsü aser rehabilitation atema sentong yanglutetsü. Commission-isa, wara pokteter aliba mapang state aser state adena orr tanga tesemtem nung tetsürtem tekümzüka dak sendakba nung ken o tali kümogo, ta ashi. Taküm UNODC omen ji "Victims Voices Lead the Way" lir aser iba ajanga human trafficking ajanga takoksa ajangshir alirtem campaign teyongtsü nung toktsür aser parnok nungi tajangshiba tem angadangtsü aser angazüktsü koda tongtibang iba indang metetdaksütsü. Nagaland State Commission

for Women (NSCW) mendenbula, Khrienuo Tachu-i, iba campaign nung ozüng alema mezüngmeshia amshiba nungi jenbor alirtem ya human trafficking anema raraba nung tongtibang actor tem asütsü aser iba mapa tamajung nokdangba, jangjaba aser timtem nung alirtem kümzüka parnok nongita yariba nung jenjang tapet agitsü atema parnoki tongtibang shilem agiba dak rangloker inyaksü, ta ashi. Commission-isa, human trafficking victim tem aikati teyari meshiba mapang parnok mashiyimi angatetba ajangshio go aser parnok kümzüka sülen interview balala aser temzüng ozüng kübok ken o ashishitepba mapang tajangshiba tamajung aika ajangshio go. Parnok rongnung karbo tanaben aitsüogo aser ozüng alema inyaksangshirtemi kangshia inyakdaksüba aibelentem atema merenshiba ajangshio go. Ano karbo lokti sentoker mesera nongita meyarier, ta Commission-isa ashi. Maneni commission-i, ozüng alema nisung pua shibelenba, talisa tetsür aser tetsür tanurtem anema inyakba maparen ya raktoktsüla ta shia nisung shibelenba anema ajak longjemer nokdaksü ayongzüik.

### Dimapur nung bendanger ka apu



**Dimapur, Chiteni/July 29 (TYO):** July 26 nü Dimapur Police-i Ugandan nunger nisung ka tenüng agi Michael Philip (35 yrs/Male) puogo. Pa VISA tailaka bener senzua lia apu. Ken o bushitsüngdangba mapang pa ket nung foreign currency notes tasazük nung black paper 4000, chemicals asütsü ta temulung melemi

bilemba bottle asem apu. Iba ajanga pa black dollar/wash wash scam nung densema aliba sayur, kechiyong paper aser chemical den benenloksema black paper tem US dollars aser Euro currency notes agi melentsü atema instructional manual dena pa ket nungi ngutetogo. Black dollar scam ya nüburtem ashiokja sen

meshizüka agitsü atema lir. Bank note sized paper tem ya Law Enforcement Agency (LEA) tem nem meputetdaksütsü atema dye asüba lir aser chemical kar amshia tanaben original dollar bills kümdaksüteter. Iba dak sendakba nung East Police Station, Dimapur nung ken o ka benokogo.

### Gurushala-i achaayanga National Aptitude Test agitsü

**Dimapur, Chiteni/July 29 (TYO):** Principal Director, Directorate of School Education, Shanavas C, IAS-i sangdong ka ajanga 'Gurushala'-i, class 6 nungi 10 tashi atema September 28 nungi 30 nü tashi taa kecha magi-i National Aptitude Test (G-NAT) agitsü

ta metetdaksüogo. Iba tetendangba ya tanurtem tashi, tejangraba, shisatsü aser sempet tendangtsü atema agir, ajita asünungdang tarutsü nung competitive tatidang balala atema renemshitsü asoshi parnok nem teyari agütsütsü. State kübok aliba school ajak

(Govt. & Private) tekolaktem dang class 6 nungi 10 tsüngda aliba kaketshirtem G-NAT atema züngoksemtsü aser iba maongka agitsü asoshi ajungmesotsü metetdaksüogo. Tenüngtem Registration Link: <https://gurushala.co/pages/GNAT> ajanga züngoksemtetsü.

### Dimapur police-i rakzürakdemer ana apu

**Dimapur, Chiteni/July 29 (TYO):** Dimapur Police-i July 22 aser 27 nü Diphupar aser Padumpukhuri tesem nung shishilembartem aser tata gari anishirtem nungi rakzürakdemer ana puogo. Aija alisang ana ya Tokugha (55 yrs) Leacy NSCN (IM) aser

Tokivi Aye (30 yrs) NSCN (K-Niki) ta jangjaogo. Iba dak sendakba nung Diphupar aser East Police Station nung ken o balala ana benokogo, ta Addl. Dy. Commissioner of Police (Crime) & PRO, Dimapur-i sangdong ka ajanga metetdaksü.

### Security Forces-i Nikki Sumi telok nungi züngsem 4 apu

**Dimapur, Chiteni/July 29 (TYO):** Security Forces aser police na longjemer July 28 nü Phek District kübok Pfutsero jila nung Nikki Sumi telok nungi züngsem pezü puogo. Osang tejangja angazükba sülen police tem den longjemer Pfutsero nung tesem kar meita aoba mapang Nikki Sumi telok nungi züngsem pezü pua liasü.

Sepaitemi parnok ket nungi 9mm pistol ka den injang teku, rakzürakdemtsü atema spil 64, mobile phone asem aser sen 7500 pua liasü. Ken o maneni bushitsüngdangtsü atema aija alirtem den parnok ket nungi ngutetba osettem Pfutsero Police Station nem bendanga agütsüogo.



## Assam-Mizoram arrtsü nung tensa süngjema lir

**Guwahati, Chiteni/July 29 (Agencies):** Assam-Mizoram nung tensa azüoka lir aser süngjema kümogo, ta Cachar district ketdangsürtemi Hokolbarnü ashi. Hopta tetenzüklen arrtsü nung mangatettep adokba sülen nisung tenet tepseta liasü.

Lailapur kübok arrtsü nung central force tem yoka lir, aser kasa mapang nung state police tem pei arrtsü telungleni meter 100 pilar ir lir.

Artsü kanga junga meita atadar aser nürburtem arrtsüleni aotsü memelar kechiyong iba tesem ya mangatettep adokba tesem ka lir, ta ketdangsürtemi ashi.

Mangatettep adokba sülen lokti tentet kari tesem kar nung

rongsentetzüing dak sendakba nung tenokdangba agütsür aliba ajungjen nokdangbabo masü, ta parokisa ashi.

Kasa mapang nung Barak Valley kübok district asem nung aliba Mizo nunger aser kaketshirtem atema security akangshiogo.

Tir Lurinjyoti Gogoi-i arir Assam Jatiya Parishad lenirtemi Silchar semdanga yirur aliba police tem den ajuruteptsü sentong yanglua lir, ta party otongdar kati ashi.

Cachar Guardian Minister Ashok Singhal, aser Environment & Forest Minister Parimal Suklabaidya nati Silchar Medical College and Hospital nung yirur temang anepalua alirtem Bodhbar

aonung semdanga yirur aliba police 35 aser civilian ana nem sen lakh 1 aser süngjanglijang agüja liasü.

Hombarnü mangatettep adokba sülen police pongu aser civilian ka kaset aser nisung 50 dak tema yirua liasü aser iba sülen Mongolbarnü ano police ka asü.

2020 küm October ita nungi tenzüka Cachar aser Hailakandi districts nung Mizoram den arrtsü nung mangatettep adoka arudar aser ki rongtoktsüba aser ali atsüingba amala tatalokba tem ajangshia arudar.

State ana tsüingda Assam kübok Cachar, Hailakandi aser Karimganj districts aser Mizoram kübok Kolasib, Mamit aser Aizawl district tem nung arrtsü km 164.6 lir.

## VLS-i Mizoram House kima longkak ait

**Guwahati, Chiteni/July 29 (Agencies):** Assam nung socio-political telok Veer Lachit Sena (VLS)-i Brehostibarnü Lailapur kübok state arrtsü nung police trok aser civilian ka tepsetba anema Guwahati, GS Road nung amenoka aliba Mizoram House kima longkak ait.

VLS züingsemtemi Guwahati tezülen Jorabat tesem nung rongsenketzüing dak sedakba nung tenokdangba ka agütsütsü amokmerenogo.

"Onoki Mizoram-i gari ka danga modaktsütsü atema kidanger state-i aoba lenmang mokdanga ayutsü," ta Lachit Sena züingsem kati ashi.

"Onok Mizoram nunger den kecha mangatettep mali, saka Mizoram nunger yimden yimsüsürtemi onok anema jembiba magizüktsü. Assam sorkari parnok anema jenjang tapet agitsü nüngdaker," ta Veer Lachit Sena lenir Srinkhal Chaliha-i osangbenertem dang

ashi.

Chaliha-i, Mizoram nungi Rajya Sabha MP K Vanlalvena tangsa tang aputsü khangogo, shibai yimjak nung Assam Police tepsettsü amokmerenogo.

"Police 200 dak tema onok litsüi ait aser parnoki onok police onok indang post nungi mintok aser onoki makha tsüingda injang akhatsü atema tetuyuba agütsü. Onoki parnok ajak mekhasetba ya parnok atema kanga tia taka. Parnok tanaben meyipa arura onoki parnok ajak tepsettsü," ta pai New Delhi nung osangbenertem dang ashi.

MP Vanlalvena dang ken o ashishitsü atema Assam Police team ka Delhi-i aposoago.

Hombarnü state ana police khatepba sülen Assam Police trok aser civilian ka asü aser SP densema nisung 50 dak tema yiruogo.

Lailapur nung Assam-Mizoram arrtsü nung tensa ano tajungba mekümei lir.

## Tripura: Courts-i I-PAC team züingsem ajak nem bail agütsü

**Agartala, Chiteni/July 29 (Agencies):** West Tripura district & sessions court-i Brehostibarnü Tripura police-i ken o benokba magizüki Indian Political Action Committee (I-PAC) züingsem ajak nem bail agütsüogo.

Political strategist Prashant Kishor kübok inyaksangshiba IPAC züingsemtem ya East Agartala police-i Hombarnü sota ayu.

Osangbenertem den sensaksema mapang I-PAC team atema counsel, senior advocate Pijush Kanti Biswas-i, I-PAC züingsem 23 anema ken o ka benok aser parnok ajaki teti atema bail meshia okadak matsüingdang bendanga agütsü, ta ashi.

"Assistant public prosecutor (APP) petition anem aser conditions benoktsü akhang. Ni okadak parnok anema ken o

benokba yimya dak ajemdaker condition kecha mebenoktetsü ta ashi aser okadaki agizüka liasü," ta Biswas-i ashi.

Paisa, APP-i benokba ken o magizük aser petition agizüka liasü. Ajisüaka aija alir 23 prongla condition kecha melei bail nung chiokogo, ta ashi.

"Parnok ya COVID-19 aser National Disaster Management Act aser Indian Penal Code (IPC) Section 188 dak ajemdaker aija liasü," ta Biswas-i ashi.

Biswas-isa, ken o ya Mongolbarnü benok aser iba masü dang parnok anema ken o ka danga benoka maliasü ajisüaka police-i parnok sota ayu. Iba ken o nung section tem ya ka danga tapet mali, ta ashi.

Kasa mapang nung Derek O'Brien, shiba Agartala tonga aruogo pai, Trinamool Congress-i hire asüba I-PAC

züingsem 23 ya Centre nung lenirtem tetuyuba nung Tripura police-i sota ayu, ta ashi.

"Trinamool Congress-i hire asüba I-PAC team züingsemtem ya mapa atem aru. Amit Shah aser Narendra Modi nati Delhi nungi kechi osang agütsü? Tenati Delhi nungi I-PAC team züingsemtem aputsü tetuyuba agütsü. Tenati India ajunga nung Gujarat model benoktsü meranger," ta Derek-i ashi.

Paisa, iba tatalokba sülen TMC lenirtemi minister tem dang state semdangtsü tetuyuba agütsüogo aser iba sülen ano MP ana dang Parliament session mena aliba mapang Delhi nungi Agartala-i aotsü tuyuogo.

Paisa, national general secretary Abhishek Banerjee Hokolbarnü Agartal-i arutsü aser state lenirtem den senden ka amentsü, ta ashi.

## Arunachal nung nisung 342 dak COVID-19 putet

**Itanagar, Chiteni/July 29 (Agencies):** Arunachal Pradesh nung Brehostibarnü nisung 342 dak COVID-19 tashidak putetba sülen state nung tashidak menar 47,142 jungogo, ta health department ketdangsür kati metetdaksü.

Taoba anogo ana tsüingda coronavirus tashidak menar moztükidang temang anepalua alir nisung asem asüba sülen state nung ajak sentepet iba tashidak agi nisung 224 süogo, ta State Surveillance Officer (SSO) Dr Lobsang Jampa-i ashi.

Tashidak menar tem rongnung Capital Complex Region nungi 109, Lower Subansiri 48, East Siang 23,

West Kameng 22, Papumpare 14 aser Lohit, Upper Subansiri aser Lower Dibang Valley nungi 13 (each) lir.

Tanungba nisungtem ya state kübok district balala nungi liasü.

Tashidak menar alirtem rongnung nisung 320 rapid antigen test ajanga, RT-PCR ajanga 13 aser TrueNat ajanga nisung 9 dak tashidak keta aliba puteta liasü, ta SSO-i ashiba den nisung 137 dak COVID-19 tashidak keta aliba temaitsü sayudar ta ashi.

Ketdangsürtemisa, Bodhbarnü shiranga alir nisung 325 taneptsü nguogo aser tang tashi nung ajak senteper nisung 42,617 taneptsü nguogo, ta ashi.



RINGWORM, ECZEMA  
ASER TEMANG  
MESAKBA AGI  
TIMTEMER ASÜ?

HAO



Ringworm, Itches & Scabies nung tangsa süngzüker



**ZALIM LOTION**

Fastest > Trusted > Tested

...By Generations

Medical  
store  
nungi  
aliang





## TIR YIMYIM YIMOBILEM (EDITORIAL)

DIMAPUR ROGONÜ, CHITENI (JULY) 30, 2021

### Tzüngluruwa lendong

**K**üm shia alima tesem ajaklen mei mapang tenzükdang, talisa, aluyimertemi tzünglu aru kanga yongyaa atar, kechiyong tzünglu agi ali metenjema aru nung dang aluyimertem alu nung ali angensaa metsüjangnüsü yok tenzüksü. Aji oda, tsüngküm süir tzünglu aru tenzükbä sülen dang anü apu, tzünglu aru ta mali alima nung akümlir mapa shitakbabo tenzüker. Ajisüaka, aiben tzüngluruwa tenzükbä mapang ya nisungtem asoshi tepelatsü masü saka takoksa, timtem aser mangyim jashi ajuruba mapang amatoang ka kuma ataloker. Aji oda, taküma alima tesem aika nung tüzümsüng agi nisung taküm aika samaogo aser nisung aika pei akaba ali rongsen ajak samar talidak maka timtemdagi. India nunga, talisa, Maharashtra, Himachal Pradesh aser Uttarakhand state-tem nung tzünglu kanga arua tüzümsüngba agi nisung noklang tema süogo aser ki aser alu ajak metsüngbanga lir. Atangji, asen lima nungbo, Tsüngrem taochi agi, tanga lima nung atalokba ama tsüngsang mopong tamajung aser tesashi arua nisung taküm aser rongsen samatsüba timtem takoksa mapang kangabo majurur. Ibayongji, asenoki tüzümsüng aser yipru mopong lendongbo majurutsü ama asenok kisüjensü aser lilbaliro nung zübazübaa aliba angur. Ajisüaka, asenoki küm ter jakdang asen lima Tuli nung tüzümsüng adokba aser Mokochung nung anentsü aluba lendongtem to bilemdangra, tanga lima nung atalokba tüzümsüng aser anentsü lendong nungi asenoka jenbua mali ta bilemtetsü. Taküm 2021 küm Nagaland nung tsüngluruwa mapang ya menur aru aser Dimapur nungbo tang tashi ali metenjema tzünglu marur. Ijabi Nagaland nung alir ajak asoshi tebilemtsü lir, kechiyong Nagaland nung alirtem asoshi Dimapur lenden nung chiyongtsü tapu aika züsentetter aser shirurutema metsür, ajisüaka tsünglu marura alutemji meyimtetsü. Ano külen, marusa lir anogo piyong mesüra aonung ka piyong tzünglu arunungbo, Dimapur ama nungbo kiyong aika melamelaa metsüngbangtsü aser talidak makar (refugee) aika akümtsü. Ano, asen lima tekong tenemlena anentsü agi lenmang anembangtsü aser kiojen dena anentsü den külemi nunger alutsüsa lendongbang nung aika alitsüa akok. Itemji asenoki tarutsü anogotem indang junga mebilemdangi inyakba ajanga lir. Asenoki tzünglua kodang marutsü amai yimti nung ayongnu dena onpanger ki asür aser ano kilentzü junga meyanglur. Iba jagi tzünglu arudang tzu taodak maka atsüngdener aser iba jagi tüzümsüng kuma yimti nung kiojen aser lenmang lenditem ajak mopanger. Atangji, tanga lima aser tanga yimitem nung tzünglu arudang tüzümsüng adoka timtem agütsübjaji asenok den balaka, kechiyong parnokji tüzim küm nung alir saka asen lima nungbo tüzimji yutsür ayonga tulubo kata mali, anungji ayong nung tzu masem nungteta adoka tüzümsüngsübjaji lenmang kanga mesüa lir. Aji oda, Nagaland ama tenem nung gari lenmang yangluba maparen nunga tanga lenden lima nung ama masü saka litebang talangka yutsür aluagiang lenmang aoer asünungji, litebang (lenmang tekalen) nung jagi ali anenzüka malutsüsa wapetsa yanglutsü aser lenmang piyong kilentzü kanga junga ayutsübjaji kanga tongtiban akümer. Ajisüaka, asen lima nung gari lenmang yangluba aser anepaluba inyakyimtem ya repringdangra, engineering yimya amshia yanglubabo memesük angur. Iba jagi lenkümbang len nungi anentsü melamelaa alur, lenmang yangluli raksar aser kilentzü maliba agi lenmang nung motzü ayimer. Joko, asenoka pei agitsü dang bilema mashimashi inyakba aser mashimashi aliba ya masü saka asen aliba tesem aser asen yimkong tüzümsüng, anentsü aser yipru mopong lendong nungi kümzüka alitsü aser asen temeket topur dena jungdaksütsüsa asen inyaksangshi ajak nung tebilemdang lia, shitakba engineering yimya nung inyaksübjaji kanga tongtiban kümogo. Joko, Municipal aser Town Council alidakbo motzüa junga maotsüsa aser ki ka yangluba agi temeket kidanger lendongi aitsüsa meyangludaksüi, jungjunga repringdang külenang, kiojen yanglutsü temelaba agütsüba inyakyim tenzüksüla aser yamaji yimtak yimtsüng nunga putu menden nung tatartemi inyaksüla. Iba jagi ki kiburjia lendong tulu nungi kümzüksü aser yimti nung alir nübertema metetsümonga lendongi maitsü.

## OLEMSABANG

### Covid-19 Samalanglang, Tekümtet züngzünga Kidangi Aittsü Mapang

~ Mrs T.Kikanaro Jamir retd H/m

Luk 19: 6 Anungji Pai ilunga alu aser pelashishia Yisu aniket .

Na aso ajen tajung ka asütsüa akok . Na tebur tajung aküm taket ka asütsüa akok. Saka nai ano Yisu majuruteti lira na rajang mesuka alitsü. Rajang ta sura aso ajen tajung ka masü, aso tatsüyimer dang nungi tatsüba ka dang ajar. Saka laishiba nungi bushidangra tanüla shisatsü nung ano maso, alima shisatsü nung dang rajang amaliyunga aruba taküm ka danga ashitsü akok. Luk 19: 3nung yamai shia lir. Aser pai Yisu shiba ta repringtsü bushi; saka pa tar tatsü asünung telokti aliba agi pai repringtsü mokoki liasü.

Pa tenung Zakia tar tatsü alimelen sarur takar nisung ka liasü. Aji suaka pai yisuji kanga dang repring dang nua liasü. Naia Yisuji nu taküm nunga ngunua lir ma ? Anungji pai pa sasa dang lemang ka bushi. Aser ibaji ya, pai mungudong kati atu aser yangji mener pa sua arubaji repringa ata-a liasü. Yangi Yisuji dang bushi nung Zakiai pa tamakokjibushitetadoker liasü. Kechiaser Tsüngremer ain iba mapang nungjisa Zakia mulungjangi yimoka aitba angur. Iba tetezü nisung mulungjang nung renembaji tongtibangtibalir, yangji dang Tsüngremi mapa inyaksü tenzüker. Yeremia 1: 12nungji ya zülua lir. Idangji kibubai kü dang ashi, " Nai junga nguogo, kechiyong jembiba inyaksü asoshi ni kü o züngzünga repringer." Aji oda tejen laishiba nung shina aliba ji tasen laishiba nung atalokba yangi angur.

Kodang Zakiai tejakleni asema ao, Yisua pa temulungjang renembaji metetadoker liasü . Anungji Yisua pa dak rangloka azüklen repring ( lokti nisung jenti liasü) saka pai Zakia tenung agi ja-a ashi, Yakta alung ni nur kidang tanü anentsüta Yisui ashiba O-ji Tekümtet Ojang masü no ? Nutsüng jenti rong nungji Tekümtet agizüktetsangji tar tatsü alimelen sarur takar nisungji masü no. Nai 1Timoti 2: 5ji züngdangang. Kechiyong Tsüngrem o nisung-na tetsüngdai aisang oda Khrista Yisu lir. Anungji khristaji mezüngbuba nu mulungjang jagi aitdaksütetra aji teperi. Nai bushibaji aji asü masü, na taginubaji aji asü masü ,iba dakji dang keta lir. Tanüngbaji Pai inyaksü nung koda ? Arungma asenoki Yisuji tamang agi repringtsü odi.

Tekümtet bener arusang Khrista kidangi aitba anogo nungji Zakiakotaker senso rong nung züngsemba mapang alitsü. Iba inyakyim mapa temelenshi tulu asenoki Khrista ajuruer külen dang angutsü. Zakia temulungjang nung Yisu Khrista arua mener mapa inyaksü tenzükbä angur. Iba yongji dang pai Yisu dang ashi. Kü rongsen tesadang ka ni sensaker nemagütsüdi ta ashi. Tanabuba nung pa mulung nung jembibaji, Paitangar ket nungi tai langka agizüka lira, ka nung pezüsu agi tali ni shia agütsüdi ta pai yisu dang shitet. Tanü putu tensa nunga iba ya kesa ataloka alitsü, nu tamangji ulushitsüla. Nai atabisua melie dang nu khuret, maksu, taküba, ratamataba, tangar dang ashitsü makokba ajak to Yisu khrista asen kibur dangi bener otetra aji teperi, tanüngbaji pai renemtsütsü nung koda ? Aji mesura na temuket tezü len senzür rong nungji dang alitsü. Zakia ama tejaklen jagi aposua odi, kong nai yisu ajurutsü aji nai mesemtetangma. Tanü Covid-19 ajanga sentepi moutet nung jashir. Aji saka asen kidang, asen meshizük nung asenoki tenla ki tasenbaji tenzüksü akok, yangjiyisu Khrista anikettsü lemang kar. Yisui dang nisung meimchir temulungjang renemtsütsü akok.

Tanüa kesa nai Yisu tejak nungji tamang agi rangloktetra nu tamakoktsü ajak tonu mulungjang nungi tsüka atoktsü. Na aki ama kodanga malitsü. Asen tekümtet khrista, nai tasüita pushitetra nu taküm nung temelenshi tulu idak nung jagi tenzüksü aser ibaji taküm küli, lenmang tasen apirtem alitsü. Iba mapang nungjisa Tekümtetjia nur kidangi aitadoktsü. Nai belemdangba, shisadangba ajakji Yisui ngualir. Covid-19 yabo samalanglang. Maneni ayimtendi Tekümtet kidangi aitogo.

AMEN.

### - Yimozülur dangi -

Covid vaccinebo 2nd dose renema agi, saka olulu tapu meyina angashiba yagi temolung animesüngzüker ta rataa alidang 15th July 2021 Tir yimyim Editorial ajanga "Vaccine Olulu Ya Sashira! Iba ya zünger temulung anisüngzüka lia, ano 22-23 July 2021 Covid 19 Vaccine : Tasembuba Tüzem Atema Tetzüdangdi -Sentilong Ozukumi Olemsabang nung kanga junga rateta züluba ya zünger temulung nung terata kecha mali, anisüngzüker nguogo. Ni amaji kar danga olulu angashir rataa lira, ni agüja aliba paperji bushia züngang aser anisüngzükerang.

Kanga pelar.

- Aienla Ao

**Iba Olemsabang nung lemsaba ken-o aser shisatsü ya iba ocet züluri  
bilemba ken-o ama tazünger agateta agitsü mepishir**



# India linük nungi Khristan missionary tem mindoktsü akhanger

**July 29, 2021:** Asia News ajanga ashiba agi, India nung MP kati India nungi Khristan missionary tem mindoktsü atema takhangba agütsüogo.

BJPMP, Rakesh Sinha-i, linük temzüng nung tamangba yimsü temeden balala agüja aliba nung ajemdaker Khristan missionary temi maangka agir aser missionary temi Adivasi nung sobaliba raksatsür, ta tai tongloktsü.

Tawa interview ka nung Sinha-i pa indang campaign "Christian missionaries, leave India" pusema jembiba mapang nung iba o ya jembiba liasü.

Taoba mapang Indian Bishops' Conference nung otongdar, Babu Joseph-i, "Rakesh Sinha-i jembiba o ajanga

onok süngmanger. Pai jembiba otem atema legal tsütsü nungi pa anema inyaktüla. Pai jembiba o ajanga India linük temzüng nung temeden agüja alir nisung aika tenüng menüktsür," ta ashi.

"2018 küm nunga pai [Sinha] tweets ajanga missionary tem anema lemsatepogo; pai parnok dang 'colonialism nungi anüngzükbapurtem' ta jaogo," ta Global Council of Indian Christians Tir, Sajan K. George-i metetdaksü.

Yimtenren tsütsü tajangzük angutsü atema mapang shia Hindu nationalists-i linük nung nisung aika Khristan Muslim yimsü dangi meyip, ta yazü osang proker, ta ICC-i metetdaksü.

India kübok state aika nung anti-conversions ozüng lir, aser

item ozüng nung ajemdaker Khristan aser Muslim nung anema inyaker.

Tawa Uttar Pradesh nung anti-conversion ozüng kübok Muslim nung ana apuba atema BJP lenirtemi tenüngsang agütsü aser Muslim nung ana jagi nisung 1,000 dak tema Muslim yimsü dangi meyipdaksüogo, ta metetdaksü.

Muslim nung ana apuba aser BJP lenirtemi ibaji pusema jembiba sülen Uttar Pradesh nung Khristan anema inyakba kanga bulua kümogo.

Taoba hopta ICC-i, June ita nung Muslim nung ana apuba sülen Uttar Pradesh nung anti-conversion ozüng tasenba nung ajemdaker Khristan 30 puogo, ta metetdaksü.

# Evangelical Church Winning All nung pastor ka reshikangshir tepset

**July 29, 2021:** Tawa Nigeria nung Evangelical Church Winning All (ECWA) nungi Rev. pastor, Danlami Yakwoi den par jabaso ana aser kinünger ka densema puer aoba sülen hopta ana lir July 24, 2021 nü pastor tepsetogo, ta International Christian Concern (ICC)-i metetdaksü.

Pastor den par jabsotem Tawari, Kogi state-i aoba mapang nung Fulani Muslim telungpurtemi puer oa liasü, ta osang angazüker.

Osangbenertem den

jembidang Arogo secretary, Musa Shekwolo-i, "Pa den densema puer aoba par jabaso kabo July 25 nü (Amongnü) chiokogo. Pa chiokba anogo jakdang tebu bo tepsetogo ta pai metetdaksü," ta ashi.

"Pastor puer aoertemi tang tashi pa tasümgangji par kibong nem magütsü, aser tanur anabo tang tashi parnok ket nung lir," ta Musa-isa metetdaksü.

"Parnoki pastor metepsetdang tama reshikangshia liasü. Yimlibilema par kibong aser Arogo atema sarasademjang," ta

Arogo secretary-isa metetdaksü.

Tang alima nung Khristan timba tepsetba linükji Nigeria lir, ajisüaka alimai ibaji junga memetet. Tesüiba küm 18 tsüngda Nigeria nung Islamic kiralongrar telok balalai Khristan 50,000 nungi 70,000 tsüngda tepsetogo aser nisung million 2 dak tema jenshiogo.

Islamic teloktem rongnung Fulani teloki Khristan timba tepsetogo. 2021 küm kija nunga tang tashi nung Nigeria nung Khristan 3,462 tepsetogo, aser parnok timbaka Fulani teloki tepset.

# ANOGO ABEN TSÜNGREM DEN

## Ni Aiatai


*Idangji ni ashi, Ni aiatai! Kechiyong ni makaka; kechiaser ni temeli memerükba nisung aser ni temeli memerükba pur rongnung alir; kechiyong kü tenük agi chuba temeranger telok Kibuba nguogo. Isaia 6:5.*

Tamaren Tsüngrem anguba agi temenen tali jangjaa angatetdaksür aser shidakba peiji angur. Tsüngrem nema anguba agi temenen süoki ia mebilemer aser pei shidakbaji mejangjadaksür. Isaiai tebang agi meshitetba Tsüngrem sentsüwangshi mangu tashi pei sasa temeshi ta bilemba nung temulung süa liasü südi. Isaiai Tsüngrem tsüktepba agi idangyongjisa pa koda temenen aser pa meketa aliba pur koda memerük aji angu. Tsüngrem külemtsü aser memelenshir dang alitsübaji tamakoktsü. Asenoki shidakba Tsüngrem külemer ta sayutsübaji temulungjang melenshibaji lir.

Asenoki temenen alima den asenok sasa hai aura akar aser temenen taküm alir asü? Kar Tsüngremi aginüba taküm alidang asenok Tsüngremi jenjang nungi ajemzuka lua alir aser tajung junga aliba nisungji temeshi ta aseni repranger asü? Asenoki asen meketa alirtem den dang asenok temeshibaji medemdangra, asenok bendanga meshitetta aliba taküm ka lir ta amangdakja asenok ashioktsütsü akok. Aji saka kodang asenoki Tsüngrem ajurudir, asenok telangzübaji "Ni aitali!" ta alitsü.

Nai meketa aliri na aser alimaji balala ta majitetdaksü tashi na meketa aliri Yisu Khrista dak amangbaji nai mangutsü. Tsüngremi Pa temeshi aliba ama na meshitetdaksüner. Kodang Tsüngremi ne dak mapa inyakdir, idakji temerüktetba ne taküm nung alitsü ibaji alimai agütsüba dang nungi balaka asütsü. Alima, na meketa alirtem dena, ne temeshiba taküm jagi temeshi Tsüngrem tenzütsü pua arutsü.

# Taküm August nungi Dec. tsüngda Khristan film 12 sayatsü




Respect



The Jesus Music



God's Not Dead: We the People (Fall)



Courageous Legacy



American Underdog: The Kurt Warner Story

**July 29, 2021:** Alima nung coronavirus wara malidang Khristan film tasen mapang shia sayaa liasü saka wara mapang Khristan film kar dang sayaogo; tang tashi alima nung iba wara maneni lir, ajisüaka taruba ita (August) nungi tenzüka December ita tashi nung Khristan film 12 shi sayatsü, ta osang ka ajanga metetdaksü.

August 13, 2021 nü Respect film sayatsü aser Kendrick aser Erwin brothers film tem densema film tasen aika sayatsü.

Khristan film tem rongnung documentaries, taküm otsü nung ajemdaker yangluba films aser sequel ka densema lir.

Taküm Khristan film 10 dak tema sayatsü aser item rongnung film trok yamai alitsü: 'Respect' film August 13 nü sayatsü. Film otsü nung aiür ka tenüng agi, Aretha-i la taküm

nung timtem aika ajurua aruba sülen tesüsa la nungtugu kentener ka akümba otsü lir.

Iba film ya Aretha Franklin taküm otsü nung ajemdaker yanglu. Lai la lanuwa Arogo nung ken atentsü ashiba sülen la osangtajung kentener nung Jennifer Hudson-i tongti shilem (Aretha) agir aser Forest Whitaker-i la tebu, C.L. Franklin shilem agir.

Iba film ya tanurtem atema masü saka Laishiba nung ajemdaker yanglu aser iba film ya osangtajung ken agi tenzüker aser osangtajung ken agisa tembanger.

Tanabuba nung 'Show Me the Father' film September 10 nü sayatsü. Iba film ya Khristan film yanglurtem- Alex aser Stephen Kendrick nati yangluba mezüngbuba documentary film lir. Laishiba nung tebu tajung ka

asütsü atema shia aliba Lai otem nung ajemdaker iba film yanglu.

Tasembuba nung 'The Jesus Music' film October 1 nü sayatsü. Film nung 1960s mapang nungi 1990s tashi aser tanü tashi nung Khristan ken melenshia aruba documentary densema lir. Iba documentary nung TobyMac, Kirk Franklin, Lauren Daigle, Amy Grant, Bill Gaither, Eddie DeGarmo aser Greg Laurie nung densema osangtajung kentener 12 dak tema interview agiba densema lir.

Khristan film yanglurtem-Jon aser Andrew Erwin nati iba film direct asü, aser iba film den külemi "The Jesus Music: A Visual Story of Redemption as Told by Those Who Lived It" kaket-a sayaogo aser iba kaket ya Marshall Terrill-i zülu. Pezübuba nung 'Courageous

Legacy' film October 15 nü sayatsü. Lendong ka atalokba sülen ang Sheriff indang deputy kati tebu tajung ka akümtsü melungteter, iba sülen pai police nung külem tenzükerterem danga tebu tajung kaka asütsü ajungshir. 2011 küm Courageous film sayaa kanga nungtugu akümba sülen küm 10 abensaba küm nung 'Courageous Legacy' sayatsü.

Pongububa nung 'American Underdog: The Kurt Warner Story' film December 10 nü sayatsü. Iba film otsü nung tilateri dokan ka nung amener kati Super Bowl nung takok anguba otsü lir. American Underdog film otsü nung Kurt Warner-i University of Northern Iowa nung college football asayaa aru saka NFL team nung pa meshimoker. Iba sülen pa Hy-Vee grocery store ka nung inyakba sülen

maangka ngua taküm nung takok angur.

Trokbuba nung 'God's Not Dead: We the People (fall)' film ya October 4-6 tsüngda sayatsü. Film otsü nung, sorkari home school kibong telok ka reshikangshiba sülen pastor-i item kibongtem pusema jembir. Tesüsa iba ken o angadangba mapang nung Congress matsüngdang kuli agütsütsü atema pastor jaoker.

'God's Not Dead: We the People (fall)' film ya God's Not Dead series pezübuba lir, aser film tasenba nung David A.R. White, Isaiah Washington, William Forsythe, Antonio Sabato, Jr, Francesca Battistelli aser Judge Jeanine Pirro nung tongti shilem agir. God's Not Dead: We the People ya koba anogo nung sayatsüar mejangja, saka October 4-6 tsüngda sayatsü.



**OLONG PAITEP # 5890**

1		2				3		4		5
				6						
	7		8							
9					10			11	12	
			13			14	15			
16					17			18		
				19		20				
21		22								23
24										
							25			

- |                               |       |  |       |
|-------------------------------|-------|--|-------|
| <b>TIPIEN</b>                 |       | <b>LANGTSÜNGLEN</b>                              |       |
| 1. Saku                       | - (4) | 1. Taksep  | - (3) |
| 6. Songjen                    | - (7) | 2. Langtem                                       | - (5) |
| 7. Mali/Tazung                | - (4) | 3. O tamendaktak                                 | - (4) |
| 9. Tasen apok                 | - (6) | 4. Nütsü tebuba                                  | - (3) |
| 11. Songtem                   | - (3) | 5. Anungdang tesangwa                            | - (3) |
| 13. Ata liasü                 | - (5) | 6. Apitet  | - (5) |
| 16. Tzünglu den külemi tsüker | - (3) | 7. Yagi jungdaksür                               | - (4) |
| 17. Aso tila                  | - (6) | 8. Anogo semer ka                                | - (3) |
| 20. Tashi maküm               | - (4) | 10. _ _ _ tatsü                                  | - (3) |
| 24. Tenüing kasa jatepba      | - (7) | 12. Tebur kidong aser zünga kasa tsüngda jatepba | - (4) |
| 25. Ki yangluba oset          | - (4) | 14. Pela agizükba tapu ka                        | - (5) |
|                               |       | 15. Tenüing atet                                 | - (3) |
|                               |       | 18. Mejanga onü                                  | - (5) |
|                               |       | 19. Talak techira                                | - (4) |
|                               |       | 21. Maneni                                       | - (3) |
|                               |       | 22. Nübo teyi                                    | - (3) |
|                               |       | 23. Meshi  | - (3) |

**OLONG PAITEP # 5889 TELANGZÜBA**

- |                                  |  |
|----------------------------------|--|
| <b>TIPIEN :</b>                  | <b>LANGTSÜNGLEN :</b>                    |
| 2. Anükalem, 4. Mesak, 5. Apet,  | 1. Kümdang, 2. Ayak, 3. Leptep,          |
| 9. Meimtep, 11. Posü, 12. Patak, | 6. Sati, 7. Yiar, 8. Sangküm, 9. Metsük, |
| 13. Tekettsü.                    | 10. Mazü.                                |



**ALOKBA O SOPANGBA NA SENSAXSEMER :**

- Sobang** : Temba, Rev. Dr. Pastorbo sen aa dang Tsüngrem o jembir südi?
- Alokba** : Onok ita sen sorkar mapa nung inyaker ama angur.
- Sobang** : Süra lai nung among nü meshiteta ayutsü bilemtetang ta shia lirtö.
- Alokba** : Aji agi onoki teti sentep ania Tsüngrem tenzüker.
- Sobang** : Süra nenokbo among nü atema ita sen angurji nenoka kodang meshiteta amonger?
- Alokba** : Oh Sobang.....
- Lilir : I.Temjen Jamir

**TANÜBO NAI LANGZÜANG**

Q. Koba küm Operation White Sea tenzük?

A.1999      B.1998      C.1995      D.1996

===== (Taruba adok nung onoki langzüksü)

**YASHI ADOK TELANGZÜBA : Italy**

**AO OSHI ANGAZÜKDAK:**  
**TANÜ ANGAZÜKTSÜBA OJANG**

**Kinük**  
(n) ki telong nung tezülen (corner)  
\* Ozü kidang **kinük** nung jangpong ayur.

**Kinüker**  
(n) ki anüker (house guard)  
\* Ato kilonser kidang **kinüker** sepai aika lir

**Tepela Tasoba Anogo**

Tanur asoba anogo nung salem osang den noksa angati adokdaksünüra - Tenüing, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

1. Tenüing : .....  
2. Tasoba anogo : .....  
3. Küm : ..... 4. Class : .....  
5. School : .....  
6. Talidak : .....  
7. Salem osang : .....

**NAI-A YA METETTER MA?**

Bodhbarnü (28.07.2021) Manipur nunger skater, Tiluck Keisam-i pa tetsüing nung roller skates semoker minute ka nung 'cartwheel' timtiba inyakba atema Guinness World Record ajanzüktetogo. Arishi küm 13 tain Tiluck ya New Delhi kübok Bluebells School International nungi class 8 nung azünger kaketshir ka lir. Pai roller skates semoker minute 1 nung cartwheel 42 tashi sütet. Iba den külemi, Tiluck-isa taoba mapang Tinuke Oyediran indang record ajatetogo. Tinuke ya London nungi lir aser lai roller skates semoker minute 1 cartwheel 30 tashi süteta liasü.

**SUDOKU # 5930      TELANGZÜBA # 5929**

						9	8			1	4	8	3	5	7	6	2	9
	4		2		7	5				3	9	6	8	4	2	5	1	7
	7	9	1		6	3				2	7	5	1	9	6	3	4	8
6			9		8					9	6	1	7	8	4	2	5	3
	9	1	6	2				4		5	8	2	6	3	9	4	7	1
	2			7	1					4	3	7	5	2	1	9	8	6
9	1		4	3	5	2				6	5	4	9	1	8	7	3	2
3						1	7			7	1	3	2	6	5	8	9	4
2			7							8	2	9	4	7	3	1	6	5

**OJANG LUTEP # 5475**

- MATE :
- EPTOR :
- UNGBAJA :
- NDAG :
- GINUN :
- UNGLTELEN :
- TEMJERENEM :
- ÜJGSENMULUNTSI :
- NGKAA :
- BASENTI :

**OJANG LUTEP TELANGZÜBA # 5474**

**ASENI TSÜNGREM ASOSHI KULI MESÜTETRA TETEMSÜ NUNG TSÜNGREMI KULI MESÜTETSÜ**

**TAN HOPTA ATEMA - KOMA SÜLA ?**

Q. Nagaland nung Covid vaccination ya nisungtem teimba ka dak magii anen nunga koma süla ?





New Delhi, July 29, 2021: Brihostibarnü Parliament kima Congress MP temi aluyimertem pusema longkak aitba noksa nung angur.

**NEP küm ka ajunger; PM Modi-i mapatong aika tenzüksüogo**

**New Delhi, July 29 (Agencies):** India nung National Education Policy (NEP) tasenba küm ka ajungba anogo nung Ato kilonser, Narendra Modi-i video conferencing ajanga kaketshirtem aser tesayurtem den jembidang Modi-i, "Asenoki asen lanurtem dang koma sayur aser koba lenmang sayur, ibaji ajanga asen linüki jenjang koba tashika tongtetsüar iba atemaji telemtetba agitsü. AtmaNirbhar Bharat (self-reliant) India atema tongtibang hadir rongnung NEP densema lir," ta ashi.

Modi-i tesayurtem training programme- Nishtha 2.0 aser school education nung course tasen- Indian Sign Language (ISL) densema mapatong tasen aika tenzüksüogo.

Modi-i tesayurtem training programme- Nishtha 2.0 aser school education nung course tasen- Indian Sign Language (ISL) densema mapatong tasen aika tenzüksüogo.

Paisa Academic Bank of Credit (ABC) tenzüksü; ABC ajanga kaketshirtem course ka

agitsü mesüra anentsü atema kaketshirtem nem temelaba agütsütsü.

Education & skill development ketdangsertem, kaketshirtem aser tesayurtem den jembidang Modi-i, "Asenoki asen lanurtem dang koma sayur aser koba lenmang sayur, ibaji ajanga asen linüki jenjang koba tashika tongtetsüar iba atemaji telemtetba agitsü. AtmaNirbhar Bharat (self-reliant) India atema tongtibang hadir rongnung NEP densema lir," ta ashi.

Modi-i tenzüksüba mapatong rongnung Vidya Pravesh densema lir; iba ya Grade 1 kaketshirtem school

atema ita asem terenemshiba dak sendakba mapatong lir.

Paisa CBSE school tem nung Grades 3, 5 aser 8 pur atema SAFAL (structured assessment for analyzing learning levels) tenzüksü aser artificial intelligence atema website ka tenzüksüogo, ta PMO sangdong ka ajanga metetdaksü.

Kasa sentong nung National Digital Education Architecture (NDEAR) aser National Education Technology Forum (NETF) tenzüksüogo.

"Item mapatong ajanga NEP 2020 nükjidongtem tongtetsü aser education sector tajungba akümtsü," ta PMO-i metetdaksü.

**Tongti onüktem nung o lemteptsü sorkari memelar: Rahul Gandhi**

**New Delhi, Chiteni/July 29 (Agencies):** Pegasus spyware ken o nung ajemdaker Parliament senden junga magitetba mapang nung Brihostibarnü taoba mapang Congress Party Tir, Rahul Gandhi-i, opposition-i mapa inyaksü atema sorkari memelar aser Pegasus, aluyimertemi longkak aitba aser osettsüset nung jenjang kanga atuba densema linük atema tongti onüktem nung o lemteptsü atema sorkari memelar, ta aitsü.

Hindi oshi nung Rahul Gandhi-i twitter ajanga, "Asen democracy atema tajemdakdakji- nüburtem atema MP temi ola adoktsüla, aser linük atema tongtibang

onüktem nung o lemteptsüla," ta metetdaksü.

"Modi sorkari opposition mapa inyaksü atema memelar. Parliament nung mapang mindoktsüla saka osettsüset nung jenjang atuba, aluyimertemi longkak aitba aser osettsüset jenjang maneni atuba atema o lemteptsüla," ta pai ashi.

Tawa Pegasus spyware amshia India nung opposition lenirtem, osangbenertem, minister tem aser kanga tongtibang nisungtem phone ajanga itangitba osang prokba sülen iba onük nung Parliament House anaprong nung senden junga magiteti arudar.

Bodhbarnüa Rahul Gandhi-i, Parliament nung sorkari

opposition ola nembangtsür aser sorkari linük nüburtem anema Pegasus hadir amshir, ta aija liasü.

Rahul-isa, Ato kilonser, Narendra Modi-i phone tem nung Pegasus hadir inoktsüogo aser ibaji amshia India nung democracy raksatsür, ta aija liasü.

Bodhbarnü Pegasus onük nung sorkar anema nokdaksü atema Opposition party balala nungi lenirtem senden amenba sülen osangbenertem den jembidang Rahul-i, opposition lenirtemi nüburtem atema maneni onük balala benoka jembitsü aser Pegasus, petrol jenjang atuba aser aluyimertem onük nung tekong meranga nokdaksü, ta metetdakja liasü.



Bhopal, July 29, 2021: Rajasthan nung by-election agitsü mapang ana nung lia Brihostibarnü Bhopal nung Congress party senden nung Madhya Pradesh Congress Tir, Kamal Nath-i jembidang tangokba noksa nung angur.

OFFICE OF THE  
**MERANGKONG SENSO MUNG DANG**  
 P.O. TULI - 798618  
 DIST. MOKOKCHUNG : NAGALAND

**TENÜNGSANG AGÜTSÜR**

Mr & Mrs. Temjenzulu Yadener jala Kongro **SENTIENLA YADEN**-i H.S.L.C tatidang nung tematiba metsü rongnung jenjang terka (11) buba nung takok tulu anguba asoshi senso ajak tenüng nung senso mungdang mendenti nungi tenüngsang aser tutushi agütsür.

Iba den repsema ano Merachiba Memorial Govt. High School Merangkong nungi shirnoki H.S.L.C tatidang nung takok ngugo nenoknem tenüngsang agütsür aser tesayur danga pelaba metetdaksür. Tsüngremi nenok ajak maneni moajangma.

**Sd/- (N. TEMJEN) President** **Sd/- (S. JONGPONGMAR) Secretary**  
 Merangkong Senso Mungdang

**SÜR KÜM 1 AJUNGER**  
**Asür. Talinungsang Longchar**  
**30.07.2020**

Küm ka süitemogo, aser na mebiletmeti anogo ka danga süitema maoer. Na kanga dang menungrar. Nai toktsür aoba tawa ya kecha agi süngdaksütsü makok, saka na Kotak nung lir ta meteta onok tesünep nung alir. Onok molung aser sarasadem nung na teti alitsü.

Onoki na kanga menungrar.

**Temeim, Kinungsü, Chirurtem, Semchirtem aser Anük-Apangtem**

**India nung ano nisung 43,509 dak Covid putet**

**New Delhi, July 29 (Agencies):** India nung ano nisung 43,509 dak coronavirus putetogo aser tang tashi nungbo nisung ajak senteper 3,15,28,114 dak iba tashidak putetogo, ta Brihostibarnü Union Health Ministry data ajanga metetdaksü.

Tesüiba ghonda 24 tsüngda linük nung coronavirus agi shiranger 640 süogo aser tang tashi nungbo iba tashidak agi shiranger 4,22,662 süogo.

Tang linük nung coronavirus agi teshirangdakpur 4,03,840 (timba) kümogo aser ibaji coronavirus caseload nungi shilem 1.28 lir.

Linük nung coronavirus agi shiranger anepba shilem 97.38 (nisung 3,07,01,612) jungogo aser iba tashidak agi shiranger asüba shilem 1.34 lir, ta Health Ministry-i metetdaksü.

Tang tashi nung coronavirus vaccine dose crore 45.07 agütsüogo. Bodhbarnü samples 17,28,795 tendanga liasü aser tang tashi nungbo samples ajak senteper 46,26,29,773 tendangogo, ta Brihostibarnep ICMR-i metetdaksü.

Tesüiba ghonda 24 tsüngda coronavirus agi asürtem 640 nungji Maharashtra nung nisung 286 asüba aser Kerala nung 131 asüba densema lir.

**Pegasus ken o atema opposition senden amen**

**New Delhi, July 29 (Agencies):** Pegasus ken o dak sendakba nung Parliament senden junga magiteti aruba mapang nung opposition party balala nungi lenirtem senden ka ayongzüka menogo.

Rajya Sabha nung opposition lenir, Mallikarjun Kharge indang chamber nung ayongzüka senden nungji Lok Sabha aser Rajya Sabha naprongla nungi opposition lenirtem aden, aser parnoki Pegasus ken o nung ajemdaker Parliament nung sorkar anema nokdaksü atema o lemtepa asalentong yanglua liasü.

Mongolbarnüa Lok Sabha nung opposition party balala

nungi lenirtem senden ka amenba sülen lenir kati, "Rahul Gandhi densema opposition lenirtemi Lok Sabha nung Pegasus onük benoktsü," ta metetdakja liasü.

Iba senden nungji Congress, Dravida Munnetra Kazhagam, Nationalist Congress Party, Shiv Sena, Rashtriya Janata Dal, Samajwadi Party, Communist Party of India (Marxist), Communist Party of India, National Conference, Aam Aadmi Party, Indian Union Muslim League, Revolutionary Socialist Party, Kerala Congress (M) aser Viduthalai Chiruthaigal Katchi nungi lenirtem aden.



# Taliban ya kasa civilian dang lir: PM Imran Khan



**Islamabad, Chiteni/July 29 (Agencies):** Pakistan Ato Kilonser Imran Khan-i Taliban ya "normal civilian" dang lir aser military telok ka masü, ta ashi aser linüki komasür parnok bushitsü, kodang Afghan refugee million asem arrtsü nung lir, ta asüngdang. PBS News Hour den sendaksemba mapang, Pakistan nung Afghan refugee million asem lir aser itemji timba Pashtuns tem lir, koba Taliban den kasa kin lir, ta Khan-i ashi. "Nisung 500,000 aliba camp aser nisung 100,000 aliba camp tem lir. Aser Taliban ya mitkar telok ka masü, parnok ka kasa

khenyongi tai ta ashir. Arrtsü nungi Taliban aridoktsüsa Kabul-i mera kar danga agira itemji Pakistan Air Force ajanga meindoktsü ta Islamabad-i tekumdangtsü osang sangoktsü, ta Afghan Vide President Amrullag Salehi ashi aser kidangeri Islamic fundamentalist telok nem tayimtsü nungi teyari agütsüba aija liasü. "Spin Boldak area nungi Taliban arishitsüsa mera kar danga agira Pakistan Air Force-i aridoktsü, ta Pakistan air force ajanga Afghan Army aser Air Force dang tekumdangtsü ashi. Tang Pakistan air force-i tesem kar nung Taliban nem tayimtsü amshia teyari agütsür," ta Salehi-i Twitter nung zülutsü. Ni ashiba nungya kari danga temolung melemi lira, kuli lemsatsü ni renema lir, ta paisa ashi. "Afghan dang Spin Boldak tanaben magitsü asoshi Pak Air Force aser Pak Army ajanga tekumdangtsü ashiba indang ni tweet asüba nung temolung malemba kar danga lira, DM ajanga ni kuli lemsateptsü molunga lir. Rangben meyitsü atema Afghan ya tali tulu lir," ta vice president-i zülua liasü.

# Tunisia Tir-i ketdangsür tali mapa nungi anentsü



**Tunis, Chiteni/July 29 (Agencies):** Tir Kais Saied-i ato kilonser mapa nungi anenja, Parliament shibangja aser executive tashi amer anogo ishika lir ano ketdangsürtem tali mapa nungi anentsüba ajanga Tunisia yimtenren koloni aotsüar mejangjai kumdagi. Deobarnü Parliament anenja Ato Kilonser Hichem Mechichi mapa nungi anentsü aser defence minister aser justice minister mapa nungi anentsür anogo ka lir Saied-i ano Mongulbarnüa ketdangsür ishika anenja liasü. Arishi küm 63 tain tir ya taoba mapang law lecturer inyaka liasü aser yimtenren tsütsü nübu tasen ka liasü, shibai 2019 küm tir election agiba nung kanga junga takok ngutet, aser army indang chief prosecutor densema sorkar ketdangsür aika mapa nungi anentsütsü totuyuba agütsü. "Linük rongsen auyaba

nung tai tonglokja alirtem nisung noklang aika tenüng yua lir aser parnok ya timba yimten yimsüsür aser parliament nung züngsemtem lir, shirnok indang 'immunity' pai Deobar aonung agientsü," ta osangbener kati Tunis nungi ashi. Linük ya meshitsüyar linük ka masü aser tarutsü asoshi jenjang tajungba langa lir, ta Saied-i ashir. Tesüiba anogo ishika tsüngta pai mera tesashi agia aruba nung temolung melemtemi alir nem molung lemdaktsütsü atema Saied-i maparen inyaka aor amai sayur, ta osangbener kati ashi. Bodhbarnü pai national television channel Wataniya indang CEO mapa nungi anenja liasü. Iba den külemi pai ozüng yanglur indang parliamentary immunity agientsü aser obendangba tashia pai amet. 2019 küm election magidang bendangeri senotsü teyari agütsüba agizük, ta temolung melemtemi aliba political party asem anema bushisüngdang tenzüksü pai totuyuba agütsü. Saied-i tim masüba lenmang nung Parliament anogo 30 anentsüba ya atsülangra timtem ajurutsü aser yimtenren mapa inyaktsü atema mapang latettsüla, ta Tunisia nung civil society telok balalai ashir. Lenmang balala ajanga linük nungi sen billion \$5 jungnüa auyaogo, ta Saied-i ashir.

OFFICE OF THE  
**LONGJANG SENSO MUNG DANG**  
P.O. : Impur, BPO : Longjang, Mokokchung : Nagaland

**TENÜNGSANG AGÜTSÜR**

2021 küm HSLC tatidang nung Government High School, Longjang nungi kaketshir takok tajung angurtem.

*Tenüngtem aser distinction anguba subject :*

<b>Bendangwapang</b> - S.sc, Ao	<b>Imnüksungba</b> - S.sc, Ao, E.E	<b>Karamenla</b> - S.sc	<b>Longkapokla</b> - Eng, S.sc, Ao, E. E
<b>Takotila</b> - S.sc, Ao	<b>Temsuangla</b> - S.sc, Ao, E.E	<b>Temsüinla</b> - Eng, S.sc, Ao	<b>Imtimakla</b> - S.sc

Maneni GHS, Longjang Küm pezü tashi atonga cent per cent jenjang ngutetba aser 2021 küm Government High School rongnungi tematiba jenjang ngutet nung Headmaster-i anir tesayurtem dang mungdangi pelaba metetdaksür. Longjang Senso Kaketshirtem 2021 Küm HSLC & HSSLC tatidang nung shirnokisa takok tajung ngutetogo senso mungdangi nenok ajak nem tenüngsang tulu agütsür. Tarustü anogotem asoshi nükla tajung ayuba kaketshir tajung ka ka asütsü senso sanger ajak sarasadem.

**Sd- M Temjen Jamir**  
President,  
Longjang Senso Mungdang


**Sd- Supongsashi**  
Secretary,  
Longjang Senso Mungdang

**MENUNGRA BILEMTETER**  
Asür AOLEPSHI JAMIR (Chuchuyimlang)

**Aso: 21<sup>st</sup> Sept. 1963**  
**Asü: 30<sup>th</sup> July 2020**

Nai onok toktsür tanü küm ka abensar, saka onok den ali ama anogo shia onoki na bilemteter. Tasübai ali taküm tembangdaksür saka na ajungba indang bilemtetba rakzüka bener moutet. Ne temeim, nai inyaktetba mapa tajungtem kodanga onoki mamateter. Onoki teti na kanga longrar.

*Temeim kinungertem.*

Bangkok, Thailand kübok Don Mueang International Airport nung khu ayudak ki ka nung yipten 1,800 aliba field hospital ka amenoka aliba noksa nung angur. Thailand nung COVID-19 tashidak agi nüburtem menepba aser asüba tali akumba ajanga health ketdangsürtemi field hospital tuluka yanglua liasü.



## Tuensang nung cooperative marketing pick-up vans tenzüksüogo

**Dimapur, Chiteni/July 29 (TYO):** Integrated Cooperative Development Project (ICDP) 2020-2021, ARCS Tuensang-i teyari agüja July 28 nü cooperative marketing pick-up vans tenzüksüba sentong agiogo. Iba sentong nung Deputy Commissioner & Chairman DLCC, ICDP, Kumar Ramnikant alakteta jaoker liasü. ICDP pickup trucks beneficiary tem rongnung Saoshou VDB MPCs Ltd, Tsadang VDB MPCs Ltd, Alisopur VDB MPCs Ltd, Jung yam Fishery CS Ltd, Shove Agri & Allied CS Ltd aser Chendang Village integrated MPCs Ltd densema lir.

Kumar Ramnikant-i, India nung nütsünyongsük tesadang dak tema agri & allied sector nung sendaka lir, ajungji aluyimertem tongtibangsa amshitsüla, ajsüaka tiamaka

## Kiphire DC, T. Wati Aier-i MTU tenzüksüogo

**Kiphire, Chiteni/July 29, 2021 (TYO):** Brehostibarnü (29.07.2021) DC's office complex, Kiphire nung Kiphire Aspirational District atema Mobile Teaching Unit (MTU) gari ka tenzüksüba liasü, ta sangdong ajanga metetdaksü.

Iba MTU gari tenzüksüba mapang, Deputy Commissioner aser Chairman Samagra, Kiphire T. Wati Aier, NCS-i, linük nung 'Aspirational Districts' rongnung adentsü asoshi state nung Kiphire district shimba ya kanga dang maongka tulu lir, ta ashi.

Iba sentong ajanga tanü tashi nung Sorkari maongka jenti agüja arudar, ta pai metetdaksü.

DC-i ashiba agi, yimtsüng balala semdanga aser kaketshirtem shishaliok bushiba wadang tsütsü nungittsü asoshi MTU nükjidong lir. Kiphire district nung, tesayur peria maliba school tem nung tesayur shitak ayutsü asoshi DC-isa Department tekolakpurtem dang mepishiogo.

Joint Mission Director, Samagra, Nagaland, Dr. Kevi Rio-i, NBSE course syllabus nung agüja aliba ama subject ajak aketba tablet ka sayaa liasü. Pai ashiba agi, class 8 nung class 10 nung azünger kaketshirtem atema item tablet lema agütsüogo, kasa mapang class 11 aser 12 nung azünger kaketshirtem nem yakta item tablet lemzüksütsü. State nung Kiphire district nem dang iba maongka tulu agütsür, ta pai shisem.

Maneni, Kiphire district nung

### ALI TAYOKTSÜ LIR

Chang Baptsit Church  
anasa, Chumukedima  
Town.

Sq.ft Rs. 350/-

Contact : 9862273765

9856247526

lokti nung parnok sentoka toktsür, ta ashi. Paisa, linük nung nütsünyongsük timba jila balala nung adenshia lir aser yimdak yimtsütem kong mapa inyakertem adenshia lir iba tesem nung nütsünyongsük ishiba lir, koba tebilemstüka lir aser iba atema shishilembadak den sendakteptsü asoshi lenmang nüngdaka lir, ta ashi.

Ramnikant-isa, organic chiyongtsütem atema shishilembadak shidak bushitetsü aser demand-a timba kümdaktsütsü kanga nüngdaka aliba lemsatep. Manei pai, pickup van tem agütsütsü atema department-i lokti tapet shimba atema tenüngsang agüja liasü. DC-i, beneficiary tem dang parnok nem agütsüba gari kanga anepalua amshitsü ajungshi, ajita asünungdang shishilembaba atsülangtsü atema parnok nem tajangzük

timba agütsütsü, ta ashi. Pai, beneficiary tem dang teka amteper inyaksü aser lokti nung longjemer inyaksangshitsü ayongzük ajita asünung dang lokti ajak külemi renloka aotsü.

Jungyam Fishery CS Ltd Nokak village mendenbuba Hangthing Khiam-i, tajangshiba kar lemsatep. Iba sentong ya ARCS Tuensang, Akhangjongshi lenisüba nung agia liasü.

In the Court of  
Principal District & Sessions Judge  
Mokokchung : Nagaland

S/C NO. 120/2021

### NOTICE

**NOTICE INVITING CLAIMS/OBJECTIONS OF OTHER CLAIMANT(S) FOR ISSUE OF SUCCESSION CERTIFICATE UNDER PART-1 OF INDIAN SUCCESSION ACT 1925**

Whereas application under Succession Act 1925 for grant of Succession Certificate for the estate/pension benefits of Late Ngangshitula has been applied by Shri. Imtimaong Pongnener S/o Lt. Ngangshitula R/o H.No. 186 Mendenti Ward Tuli Mkg. Nagaland for possession of :

GIS, Gratuity, Leave encashment, NPS, Closing of A/c.

Notice is hereby given that any person having interest in the administration of the estate/pension benefits of the said deceased may if she/he so desire appear in this court on or before the said day of 27.8.2021

Given under the hand and seal of the court on this the 27.7.2021

Sd/-  
Principal District & Sessions Judge  
Mokokchung : Nagaland

## MOKOKCHUNG DPDB FELICITATES TOPPERS

Congratulations on your incredible achievements, which no doubt, is a result of your hard work and dedication. The challenges you have faced this past year with the COVID-19 pandemic have been immense and you have shown great resilience and perseverance. Students of 2021 - you are a special class.

Throughout our district history, we have produced great luminaries who have contributed for Mokokchung and beyond. Mokokchung is a better place when its citizens bring out the best in themselves. Today, we are elated to have such an outstanding group of young students who have brought laurels to our district by securing 3rd, 11th and 16th position in the HSLC State Top 20 merit list and also 6th and 7th position in the HSSLC (science stream) top 10 merit list respectively. Our sincere congratulation also goes out to all the state toppers in your respective subjects.

Dear teachers, in the wake of the COVID-19 pandemic, among the many adjustments to your lifestyle, classrooms shifted from in-person to remote learning amid social distancing guidelines. You adapted and delivered the transition to form personal connections with a humane touch from across a digital screen to every young face. It show dividends in the results with schools even from the rural areas of our district delivering 100% pass percentage. For all of these reasons and more, thank you for going above your call of duty.

Parents have had their share of challenges in this new normal. As a parent, you've had to balance your personal life and reinvent what parenting means. Thank you for your empathy, patience, and perseverance.

On behalf of Mokokchung DPDB, we would like to take this opportunity once again to congratulate all the HSLC and HSSLC toppers of 2021 and pray for success in your future endeavors.

Sd/-  
Limawabang Jamir  
Deputy Commissioner &  
Deputy Chairman DPDB,  
Mokokchung

Sd/-  
Tongpang Ozukum  
Minister PWD (H&M)  
&  
Chairman DPDB, Mokokchung



**WORLD DAY AGAINST  
TRAFFICKING  
IN PERSONS  
30 JULY**

### Why a Blue Heart?

The Blue Heart represents the sadness of those who are trafficked, while reminding us of the cold-heartedness of those who buy and sell fellow human beings.

*You have legal protection against sexual harassment.*

*Konba apuni upor te biya kam kurile Police/NSCW/ One stop Sakhi helpline 181 te call kuribi.*

*Why suffer in silence when you don't have to?*

*Chup chap na thakibi. Kobi!*

*Cyber Crime is a punishable offence.*

*Internet para maiki khan ke dikdari di le saza ase!*

*Selling sex is punishable by law.*

*Rendi kam kurile bal nai: saza ase.*

*Buying sex is liable to imprisonment and fine.*

*Rendi khan cholai le bal nai: saza ase.*

*Brothel-keepers/pimping begets imprisonment and fine.*

*Rendi laga danda kurile fine aru jail hobo.*

*Forcing others into prostitution is a crime.*

*Jobor josti manu ke rendi banatu saza ase.*





## Tokyo Olympics: Satish Kumar quarter-final-i iogo

## Mary Kom Round of 16 nung tsükogo



Tokyo, Chiteni/July 29, 2021: 2020 Summer Olympics nung Columbia tsür Ingrit Lorena Valencia Victoria aser India tsür Chungneijang Mary Kom Hmangte na women's flyweight 51-kg boxing match asayazüker sülen tangokba noksa ka yangi angur.

**Tokyo, Chiteni/July 29, 2021 (Agencies):** Olympic asayamung tebur heavyweight category tetoktepba nung, Satish Kumar (+91kg)-i pa nem lezmüksüba mezüing bout takok ngua quarter final tongtetogo.

Tebur heavyweight round of 16 tsüingtepba nung, Satish-i Jamaica nunger Ricardo Brown madak 4-1 agi takok angu aser Bulandshahr nungi arishi küm 32 tain Satish-i Olympic medal takok angutsü asoshi taruba round nung pai takok angutsüla.

Pugilist anaprongla (Satish aser Ricardo) taküm Olympics nung mezüing shilem agir asütsü. Iba bout asayaba mapang, Brown indang tasa (footwork) nung tashimaitba asadanteta Satish-i maongka agia asaya, saka Brown-i atsüingba mapang, Satish tenütsü yirua liasü. Brown-i tashi ajak agüja Satish dak tsüingoktsütsü merangdang, saka Satish jeretpera asayaba yong Brown tasa nungi pa jenbo.

Satish-ia telanzüba agüja, Brown dak tsüingokja asaya. Pai (Satish) teka achiji timba amshia asaya aser Brown nem metsüingshidaktsütsü atema pai tasa amshi.

Arishi küm 31 tain Brown, shiba küm aika nung par linük nungi iba Games atema qualify asür boxer rongnung pa mezüing asütsü, Tokyo Olympics lapokba sentong nung Jamaica contingent atema pai wako amer shilem agia liasü. 1996 Olympics sülen, taküm Olympics nung Jamaica nungi Brown-i boxer ka ama mezüing shilem agidar.

Kasa mapang, Tokyo Olympics nung bout angur mezüing India tebur boxer rongnung Satish asütsü. 2016 Rio Olympics nung shilem

agitsü asoshi, point ishikati Satish qualification nung maden, saka Asian Olympic qualifiers asayamung nung pai bronze medal takok anguba den külemi Tokyo 2020 nung asayatsü maongka angu.

Deobarnü (01.08.2021) Satish-i Uzbekistan nunger Bakhodir Jalolov den quarter final asayatsü.

**\*\* Mary Kom Round of 16 nung tsük**

Brehostibarnü, trokben world champion M.C. Mary Kom (51kg)-i Olympic medal tanabuba takok angutsü teimla nung asaya, saka pre-quarters nung la tsükadok. Tetsür Flyweight category - Round of 16 asayaba mapang, London Olympics nung bronze medal takok angula, Mary-i Colombia tsür seed tasembuba Ingrit Valencia makok.

Kokugikan Arena nung bout

round asem nungi Mary-i round ana akok, saka 'split decision' ajanga Ingrit-i iba bout koktet. Tanur pezü tetsü, Mary-i taküm Olympics nung tatembangbuba shilem agir asütsü.

Iba bout mezüing round nung Mary 1-4 agi Ingrit tesülen ser tenzüker aser tetendanger pungo rongnung par pezüi Ingrit pusema 10-9 agütsü.

Tanüingba round ana nung, judge pungo nungi par asema Mary Kom pusema point agütsü, saka asayar ana tsüingda point medemdangra, Ingrit-i timba ngur liasü.

Mary-i round tasembuba atonga akok, saka tena tsüingda 4-1 masü 3-2 ang liasü. Arishi küm 38 tain, shiba Asian champion asayamung balala takok anguba den 2012 London Olympics nung bronze medal angu, lai 2-3 agi Ingrit makok.

## Tokyo Olympics: Atanu Das 'Round of 16' tongogo

**Tokyo, Chiteni/July 29, 2021 (Agencies):** Brehostibarnü, Tokyo Summer Olympics 2020 - tebur kija Recurve Archery asaya nung, Atanu Das-i London Olympic gold medal takok angusang Korea nunger Oh Jinhyek tsükdaktsür sülen, Round of 16 tongogo.

Tebur Recurve Archery asaya tasak ana tashi ajangshia aruba sülen, Yumenoshima Final Field nung Atanu-i junga shilem agia liasü. Atanu kinungtsü Deepika Kumari, shiba World No. 1 nung lir, lai repranga lia asaya.

Iba round of 32 asaya set 5-5 nung toktepba mapang, Atanu Das-i 'bullseye' nung khalokja Oh Jinhyek tsükdaktsü.

Honibarnü, tebur kija Round of 16 tetoktepba nung Atanu Das-i Japan nunger Takaharu Furukawa den asayatsü.

Hokolbarnü, Women's Individual Recurve -Round of 16 nung Deepika asayatsü terenemba lir aser iba mapang Atanu-i Deepika indang support staff aser külem athlete ka ama yaritsü imlar.

Taoba Olympic champion Oh Jinhyek den asayaba mapang, Atanu Das-i mezüing arrow anaben tashi khaloktsür sülen pai 8s ana ngua tenzüker. Tesüiba anogo ishika tejakdang, arishi küm 39 tain Jinhyek-i Men's Team gold medal takok ngur sülen iba round nung asaya liasü.

Jinhyek-i mezüing set 26-25 agi akok aser Atanu-i pa menepa asayatsüsa aküm.

Ajisüaka, Atanu-i tasa tajung amshia asaya, kong tanabuba aser tasembuba set tie nung atemtsü asoshi pai arrow 9 nung arrow 7 shi junga khalokja asaya.

Set pezübuba tenzüker sülen, Atanu-i mezüing point 10 angu aser pai 27-22 agi Jinhyek ajateta iba set akok. Jinhyek-i point 7 nung khaloktsü.

Iba asaya piyong Deepika-i la kinungbo Atanu pusema liasü. Ano, stand nungi külem staff temi Atanu nem tasa balala agütsü. Final set nung Atanu-i 10, 9 aser 9 angu. Jinhyek-i Atanu den meneptepa asaya aser iba asaya 5-5 tie nung tembang.

Atanu aser Jinhyek na tsüingda shoot-off asayaba mapang, Jinhyek-i 9 ka angu. Iba sülen, Atanu-ia aginüba ama 10 ngutet iba asaya koktet.

Kasa asayamung tebur kija Round of 64 tetoktepba nung, Atanu-i kanga dang meranga Chinese Taipei nunger Yu-Cheng Deng madak 6-4 agi takok angu.

Maneni, tan hopta tetenzüklen, team archery asayamung nung tamakok ngur sülen, kija asaya nung Atanu-i asentenshir shilem agia arudar. Ranking Round nung India tebur Recurve Archer rongnung temaba jenjang nung alisang, Atanu-i Pravin Jadhav tesülen ser tembang aser pai Mixed Team berth nung shilem magitet. Iba tetoktepba nungi India team yakta tukadok asünung, Men's Team event nung pai anogo ka masayatet.

## India tebur hockey team quarter-final-i iogo

**Tokyo, Chiteni/July 29, 2021 (Agencies):**

Brehostibarnü, Tokyo Olympics - tebur hockey asayamung nung Varun Kumar, Vivek Prasad aser Hamranpreet Singh nungeri goal ka ka idakja, par teloki 3-1 agi Rio Olympics gold medal takok angur Argentina team kokogo.

India team-i asaya tenzüker külen nungi Argentina amokbanger asaya aser parnoki goal ka idaktsür lia, quarter pezübuba nung Argentina-i goal ka idaktsür sülen team anaprongla goal 1-1 akümba mapang, India team quarter metongtettsü ama arendaka liasü. Ajisüaka, parnoki maoksa aser süngjema dang asaya. Iba mapang, India-i ano goal ana tashi atonga idakja asaya koktet.

Tang, tebur hockey asayamung group stage nung India team-i asaya asem nungi point tuku nguogo. Iba group nung parnoki point 5 agi tasembububa jenjang nung alir Spain ajatetogo aser group nung match ka dang asayatsü anünga lir.

Mezüing half tashi India-i amokbanger asaya yongjia, te anapronglai goal idaktsütsü maongka angu. Mezüing quarter ana nung, Argentina den medemdangra, India-i shilem timbaka amokbanga asaya.

Mezüing half nung, India-i penalty corner aika mangu, saka tasembuba quarter nungang India atema PC maongka timba lapoktsü. Argentina atema Matias Rey-i goal ka idaktsütsü merangdang, saka Sreejesh-i Rey dang nungi ball rakzüka

iba goal nokdangtet.

Tatsüka lir, India-i penalty corner ka angu aser Varun Kumar-i goal idakja, India team goal 1-0 agi tejakdang kumadok.

Pezübuba quarter nung, penalty corner ka ajanga Maico Casella-i Argentina atema mezüing goal idaktsü. Iba quarter nung India pur asaya yimya melenshiadokba sülen, Argentina puri toktepa asayatsü tenzüker.

Argentina telok nem amokbangdaktsür lia, minute 56buba sülen ang, India pur asentenshir asaya liasü. Minute ana sülen, India team goal 2-1 agi tejakdang akümtsü atema, penalty

corner ka ajanga Vivek Prasad-i goal tanabuba idaktsü aser minute 1 sülen, vice-captain Harmanpreet Singh-i penalty corner ka ajanga goal tasembuba bendenlokja, India team-i 3-1 agi iba asaya koktet.

Group A nungi Australia dak alaka quality asütsü anünga aliba team rongnung India asütsü. India team-i iba group nung asaya tatembuba takok ngura, parnok Australia de point kasa akümtsü akok. Ajisüaka, Australia pur goal 13 dak tema agi India ajateta lir asünung, India team-i point nung Australia meneptsü asoshi lenmang aika madoker.

## BILEMDANGANG

"Alima oset aika akaba jagi Tsüngrem nungi anguba senmang ka madoksa."